

■ CONVIVENZA

Lain surmuntar il foss dal rösti

DA BETTINA CADOTSCH*

La stad è qua. Igl è fanadur, ils purs èn vi da far fain, la glied ch'ha vacanzas è vi da far bogn e vi da viandar. Ma questa stad van paucs en Italia a far «dolce vita» e paucs sgolan utrò. La raschun enconuschain nus tuts: il coronavirus.

Alura stain nus oramai qua. – «Nus faschain il meglier ordlonder cun far in Tour de Suisse.» Quai èn construcziuns ch'jau hai udì savens l'ultim temp. Questa situaziun cun las vacanzas ma para zunt interessanta. I mussa puspè ina giada divers aspects da nus.

En general cumprovi ch'i va simplamain meina bain cun nus Svizzers, ma che nus na stimain betg quai. En cumparegliazion cun auters pajais avain nus gi in decurs da la pandemia main nausch. Nus essan in dals pajais ils pli ritgs, uschia che blers han survegnì in sustegn finanziel dal stadi. Nus avain ina politica ch'emprova dad ir ina via cun blers cumpromiss per pussibilitar a la populaziun ina vita uschè normala sco pussaivel e che guarda a medem temp per sia sanadad.

Naturalmain lascha quella crisa er enavos fastiz. Tar la glied ch'ha



pers insatgi, tar la glied cun affars ch'han patì e tar l'economia ed il turissem che vegnan a suffrir anc vivant. Jau hai però il sentiment ch'il pli grond problem da bleras personas saja da betg pudair far vacanzas sco planisà. Ma ueila! Pudain nus ina giada metter enavos noss problemet? Cun star ina giada en Svizra na perdain nus crai jau nagin piz da nossa curuna! E quel che less ir a l'exteriur ha gia pussaivladads da far quai – savens cun restricziuns, ma i va!

Jau sun da l'avis che nus hajan uschè in bel pajais, ma che nus na realiseschian quai betg propi. Nus avain lais, nus avain muntognas, nus avain bellas citads. Nus avain gauds, nus avain cuntradas grondiusas e diversas attracziuns culturalas. Nus avain propi bler – sulettamain nagina mar. Igl è però in pau donn che la glied vesa las vacanzas en nossa patria sco vacanzas da substituziun.

Jau stoss dir ch'a mai mancan propi ils turists da l'ester che vegnan tar nus ed èn simplamain fascinads da nossa patria, da nossa bella natira, da nossa bun'aua da spina, da noss chaschiel, da nossas vatgas, da nossa tschigulatta. A mai mancan quels ch'èn schiglius che nus abitain en lieus nua ch'els fan vacanzas.

Tenor mai stuessan nus esser autocritics e propi nizzegiar questa stad per puspè ina giada realisar quant leds che nus pudain esser d'abitar en in pajais talmain bel e segir sco la Svizra. Nus pudessan era vesair questa stad sco schanza per imprendier d'enconuscher meglier nossa Svizra, da stimar ella e da surmuntar l'uschenumnà foss dal rösti. Nus avain 26 chantuns, quatter linguas e bler dapli da porscher che quai che nus cartain. Jau pens ch'i faschess propi bain a nus dad ir quest onn ina giada plitost sur ils cunfins chantunals empè dals naziunals per puspè stimar dapli nossa patria.

* Bettina Cadotsch è creschida si a Savognin. Ella studegia Multimedia Production a la Scola auta spezialisada dal Grischun a Cuira e lavurata Radio Südostschweiz e «suedostschweiz.ch».

La convivenza da las linguas e culturas – quai è il tema da las columnas che cumparan sut il titel «Convivenza» e che vegnan publicadas mintga glingdesdi en la «Südostschweiz» ed en La Quotidiana.